


林文忠公政書

甲集卷三、四、五

柳田文庫
文庫11
D 327
2



文庫 11
D 329
2

覆奏查辦災賑情形摺

奏為查明現辦災賑情形恭摺覆

奏仰祈

聖鑒事竊臣承准軍機大臣字寄道光十三年十月

二十九日奉

上諭據給事中金應麟奏稱積貯之利無窮補救之
利有限被災地方窮民最苦而豪棍最强富戶最
憂而吏胥最樂有攙和糠粃短缺升斗私飽已橐
者有派累商人抑勒鋪戶令其幫助者有將紳

本
文
卷
八
文
書
日
美
江
蘇
奏
稿



010190566957

48-2435

家丁佃戶混入丁冊希圖冒領者有將本署貼寫
阜班列名影射者有將已故流民乞匄入冊分肥
者有將紙張飯食車馬派累保正作爲攤捐者有
將經紀貿易人等捏作饑民代爲支領者甚至將
已經報荒之地水退不准耕種以待州縣履勘名
曰指荒地畝百姓漸至逃亡而奸狡之徒以災荒
爲得計賑糧到手猶復隨衆扳號本境已完旋卽
改居他邑米船過境設卡截留典鋪未開邀人爬
搶生監把持婦女喧嚷種種惡習不可勝言州縣

略加懲處吏胥卽串同土棍鬪堂毀辱上司慮生
事端予以撤任於是相習成風冊籍付之糧吏銀
米委之劣衿今歲已賑明歲復然真正饑民全無
實惠加以疲猾州縣剋扣賑糧彌補虧空病國病
民尤堪痛恨從前乾隆嘉慶年閒捏災冒賑之案
無不盡法處治今十數年來各省督撫未有參劾
及此者豈今之州縣勝於前人乎總緣各上司憚
於舉發故雖百弊叢生終不破案實爲近來痼習
嗣後各督撫府尹務當激發天良力除積習於稔

收處所積存穀石不准僅畱例價於歉收處所訪查各弊不得稍事姑容倘不能實力實心認真查辦再有前項弊端經朕派員查出或別有訪聞定當從嚴懲處決不寬貸等因欽此仰見我

皇上念切民生

澤必下究惟恐一夫不獲務期百弊盡除臣跪誦再三莫名欽凜伏查災賑之弊悉數難終而致弊之由非一端卽舞弊之人亦非一類若但統謂之弊而未經分別推求則雖極意剔除終恐情

形隔膜卽如該給事中臚舉各弊有在土棍者有在生監者有在吏胥者並有在州縣者臣請分晰陳之士棍之弊在於悍潑如該給事中所稱扳號喧嚷截米爬搶等情皆係實有之事然猶其淺者耳其兇惡情形則在強索賑票不許委員挨查戶口如不遂欲則拋磚擲石潑水濺泥翻船毀轎甚至將委員擁置空屋扇鏹其尸以爲要求必得之計並主使邨莊婦女百般凌辱尤爲莫可理喻其於殷富之戶則恃衆闖鬧

名曰坐飯又曰併家而統謂之吃大戶公然傳
單糾約助勢分贓不獨設立災頭並有管帳包
廚等名目如十一年

奏辦之陸長樹王玉淋等案卽皆土棍之尤屢經
嚴挈痛懲近雖稍知斂戢而惡習總未盡除當
茲災歉頻仍惟有寬猛兼施隨時懲處若指此
爲辦災之弊則弊在民而不在官緣此種兇徒
不但州縣疾之如仇吏胥尤畏之如虎似無敢
與串同之理也生監之弊在於包攬平居無事

慣寫災呈一遇晴雨欠調卽約多人赴官呈報
若經有司駁斥輒架民瘼大題聯名上控及聞
查賑則各捏寫戶口總數勒索賑票自稱力能
彈壓只要遂伊所欲便可無事否則挾制官吏
訐告不休京控之案往往若輩爲之吏胥之弊
在於捏冊當報荒之始卽造具災形圖冊詳載
區圖斗斛謂之註荒迨給賑則有口冊賑票飯
食紙張在在需費吏胥卽借災費爲名於查荒
時索錢賣單查賑時捏名人冊先藉口於賠墊

而暗遂其侵欺此等或愚弄本官或買囑委員或勾結生監尙皆事所時有曾經懲辦有案若謂其串同土棍則彼此判若兩途拒之惟恐不嚴避之惟恐不遠未必引而近之以自取累也凡此三種舞弊之人欺詐萬端不勝枚舉尙不止如該給事中所陳然扼要總在州縣州縣廉則人不敢陷以利州縣嚴則人不敢蹈於法州縣勤而且明則人不得售其奸所慮災賑之區難得許多良吏誠如

聖諭豈今之州縣勝於前人此臣所以深思原本而必以察吏爲最亟也幸賴我

皇上澄敘官方首以清廉爲重近來江蘇州縣雖其才幹未必果勝前人而辦災一事實係清賑不能更有侵冒之事亦非必其人之皆清而實有不得不清之勢也蓋放賑總以稽覈戶口爲第一要義如道光十一年江蘇災重且廣維時督臣陶澍與升任撫臣程祖洛先後奏定災賑章程力除積弊責令委員戶必親填人

必面驗票必親給查完一戶卽以油灰書其門首查完一邨卽將戶口榜諸通衢俾人人共聞共見迨查過數邨彙開口數清摺先由委員申報司道仍將花名底冊移送該管州縣其賑票之上蓋用委員銜名戳記使驗票卽知何員所查是委員查報之後印官若欲添一戶口而印票底冊榜示清摺四項總不符合卽欲作弊而勢有不能至印官之稽察委員祇須攜冊下鄉抽查如其有冊無票有票無榜或票榜與冊不符卽將委員稟揭又有各上司層層覆查如印委通同迴護有弊不揭察出一併參辦其委員吏役薪水紙飯皆由督撫司道捐廉優給俾免賠累而杜需索彼時印委各員頗知惕然遵守復蒙我

皇上軫念民艱

欽派大臣朱士彥白鎔來江督辦一時官吏更加震肅生監地棍人等亦知歛迹積弊爲之一清道路傳言皆謂之清賑嗣後查辦災務卽以此爲

林文忠公政書

甲集

江蘇奏稿

六

定章臣又嘗剴切札諭各屬以地方官辦理命盜案件如有故勘致死卽干抵償然猶不過一人一事若辦賑有所侵蝕是直向千萬垂斃之民奪之食而速其死卽使倖逃法網天理必不能容況江蘇前有山陽縣王伸漢冒賑之案府縣皆陷重辟大吏亦干嚴譴尤時時指爲炯戒聞者莫不股栗今平心論之如王伸漢之貪婪殘忍不惟現在州縣不至如此卽數十年來亦所僅聞且查王伸漢案內山陽一縣所領賑銀

至九萬九千餘兩之多今十二縣衛賑銀通共請撥十三萬兩值此連年災歉饑口繁多因經費有常不得不力籌撙節減之又減幾於杯水車薪卽有貪員亦已杜其浮冒地步且例賑之外無處不賴捐輸協濟若有司以賑銀入己而轉令民戶書捐則必爲衆所切齒一日不能相安豈肯聽其勸諭而刁生劣監虎視眈眈如州縣稍有營私則詭詐分肥人人得而挾制縱將所領賑銀全給詭詐之徒尙不足填其慾壑安

能更有餘銀人已況災民嗷嗷待哺豈不慮激成事端州縣卽不顧聲名斷無不惜其身家性命似此受制於人而仍無利於己之事雖至愚亦不肯爲而自督撫以至道府皆職司糾察災賑重務孰敢徇庇姑容是今日之州縣無從舞弊旣爲法令所束屬時勢使然該給事中所奏或係從前舊弊而非近來事歸覈實之情形也至積存穀石原係備荒善政惟近年連遭災歉穀價增昂卽鄰省亦非豐稔不惟向存例價

不敷買補抑恐官爲採買民間食貴堪虞仍應俟年歲稔收後糧價稍平再飭各州縣籌買歸倉以爲有備無患之長計總之民生凋敝之際官斯土者無不棘手焦心惟矢此一片血誠上以宣

皇仁而下以結民信局中之苦不敢求諒於旁人所謂及之而後知履之而後難也臣惟有恪遵聖諭察覈加嚴不敢市惠以沽名亦不敢因噎而廢食總使有司畏

朝廷之法則積弊去而吏治清小民感

君上之

恩則元氣培而本根固庶以仰副我

聖主察吏安民

訓誠諄諄之至意謹將實在情形恭摺覆

奏伏乞

皇上聖鑒謹

奏

籌挑劉河白茆河以工代賑摺

奏為劉河白茆河年久愈形淤塞議請撙節估挑

以工代賑分別借

帑捐辦恭摺奏祈

聖鑒事竊照蘇松太倉等屬為錢漕最多之區水利

農田攸關重大該境有吳淞黃浦劉河即古所

謂三江其北又有白茆河自為一大支與三江

相為表裏此道光四年閒奉

旨飭辦三江水利因高堰方舉大工集夫不易僅將

黃浦一路先為挑浚道光六年

諭旨飭挑吳淞江其餘劉河白茆各工竝經

奏明分年辦理惟因工費較鉅查道光四年奉

旨飭辦案內曾估需銀四十萬餘兩頻年籌措維艱

祇有糶變米價餘贖銀五萬餘兩奏奉

恩准雷作劉河工用仍須另籌款項方可湊辦年來

河道愈形淤塞農田連遭積歉更宜亟修地利

以期補助天時而地方紳民先後懇請興挑呈

詞盈帙察看輿情甚為急切節經臣等飭司委

員覈實勘估樽節籌辦去後茲據蘇州藩司陳

鑾署臬司李彥章蘇松太道吳其泰會詳稱劉

河為古婁江源出太湖東北至新陽縣界與吳

淞江分流而東繞太倉州城歷鎮洋嘉定二縣

境綿長七八十里白茆河坐落常熟昭文二縣

境內上承長洲元和無錫金匱江陰諸水綿長

五六十里均因淤塞多年幾成平陸旱澇俱無

從灌洩田疇即漸就荒蕪錢漕亦愈難徵比該

兩河急需開浚實為目前必不可緩之工但尾

閘皆有壩身外高於內若必開通海口恐潮汐
倒漾轉易停淤且口門皆有攔沙挑濬倍爲費
力卽開通之後漲沙恐復相連今爲農田起見
期於利灌溉而便疏消則莫若挑作清水長河
不必求通海舶旣節目前之工費且免日後之
受淤其爲利益農田似有把握先經該藩司檄
委署蘇州府知府陳經太倉州知州李正鼎青
浦縣知縣蔡維新公同履勘估計續又添委蘇
州府知府沈兆澐元和縣知縣平翰前上元縣

知縣黃冕會同署太倉州知州周岱齡鎮洋縣
知縣曾承顯署常熟縣知縣藍蔚雯昭文縣知
縣張綬組逐段丈量分別造冊呈送竝以上年
秋禾被歉現值青黃不接之時小民力食維艱
正宜以工代賑稟請卽時興辦復經該藩司親
往覆勘劉河自吳家墳港口起至白家廠又鹽
鐵老壩基起至吳家墳港又老虎灣至紅橋灣
及陶家嘴錢家嘴等處通共約計工長一萬五
百一十六丈估挑面寬十丈餘尺至八丈餘尺

不等底寬三丈平水面浚深九尺又南北兩岸切灘竝挑土山土埂以及修築通工壩閘空廢民田給價等項共約估銀一十六萬五千三百二十餘兩白茆河自支塘東勝橋起至海口止工長七千八百四十丈估挑面寬六丈底寬四丈深一丈所需挑濬土方併建新閘及滾水壩一座共約估銀一十一萬兩零惟兩處工程竝計需款較多自應分別籌辦請將劉河借項與挑分年攤徵歸款白茆河歸於官民捐辦等情

詳請具

奏前來臣等伏查劉河白茆河兩處均係早經勘估

奏明必應辦理之工惟從前估計係欲挑通入海而議者謂其海口高於內地潮來旋即淺河又謂口門現有攔沙即極力挖通不久恐仍堵合且鑿沙通海需費太繁款項難籌是以未能興辦近因旱澇無備田畝頻至歉收若再因循此後愈難為力且民間望霑水利與目前望賑同

一急切之情尤須乘此興工乃爲一舉兩得竊思挑通海口工費既大而能否經久轉不可知不若挑作清水河工省利長於農田實有裨益緣三江之中黃浦吳淞兩處海口水勢皆已暢出惟因劉河白茆兩處淤塞東北一帶之水溢於平疇今將此兩處河道開通其長一百數十里可資容納正不必自闢海口而與吳淞黃浦交匯通流適足以助其建瓴之勢查劉河老鎮本有閘座可以隨時啟閉今擬於閘外白家廠

之地再建滾水石壩一道以堵渾潮白茆河亦於海口縮入數段建閘築壩使潮汐泥沙平時不能壅入如遇內河水大仍可由壩上瀉出歸海則河水有清無渾卽永遠有利無害其劉河估需土方壩工等銀十六萬五千三百餘兩係屬節省無浮除遵照

奏准之案動撥緩漕米價五萬三千餘兩外其餘銀兩查有司庫現存水利經費專款銀五萬兩本係從前議濬三江案內

奏明爲蘇省水利之用應請儘數動撥尙不敷銀六萬二千三百二十餘兩請於封貯款內借支所借之銀在於同霑水利之蘇松太三屬長洲元和吳縣吳江震澤崑山新陽華亭婁縣上海青浦太倉鎮洋嘉定寶山崇明十六州縣按照銀數均派分作八年按畝攤徵將來解還司庫除先歸米價外餘皆收作水利經費專款以備蘇省將來續修各處水利之需仍照舊案俟收有捐監銀兩首先歸補封貯原額其應挑工段

亦請循舊歸於太倉鎮洋嘉定寶山崑山新陽六州縣計畝雇夫分股承挑至白茆河估銀一十一萬兩零亦屬節省辦理惟經費有常未敢概請借

帑臣等現在率同司道府縣倡捐廉銀竝諄勸常昭兩縣紳商富戶以此河旣係萬不可緩之工而民情又處迫不可支之景各宜勉力捐貲以工代賑該紳民等聞而感奮均各踴躍急公現已議定章程自可捐收如數臣等仍督率司道

遴委廉明勤幹之員協同地方官選董集夫隨
捐隨辦並責令該管道府州於西河工程各須
認真查察一俟工竣由臣林則徐親往驗收不
許稍有草率偷減並不合假手胥役地保稍滋
弊竇以期工歸實在利濟農田仰副

聖主爲民興利之至意除將劉河挑工取造估計報
銷各冊繪圖另行

題咨外其白茆河係捐辦之工應請毋庸報銷謹
合詞恭摺具

奏伏乞

皇上聖鑒訓示謹

奏

江蘇省各屬捐賑情形片
再江蘇省上年災歉仰蒙

聖主疊沛

恩綸賑恤蠲緩復於今春加

賞口糧小民莫不感淪肌髓地方官職司民牧於一

切拊循綏輯更宜仰體

皇仁而自上冬以迄今年春夏爲日正長不得不藉

資衆力廣籌接濟先經臣與督臣陶澍率同司

道府縣捐廉倡導竝督飭各屬諄勸紳商大戶

勉力捐輸以爲安貧保富之計截至現今各處
義賑均已集有成數分別散放其捐項較多之
處如蘇州省城捐錢十四萬三千餘千寶山縣
捐錢九萬二千餘千丹徒縣捐錢八萬餘千上
海縣捐錢七萬八千餘千嘉定縣捐錢五萬五
千餘千江陰縣捐錢五萬餘千此外各屬所捐
自一萬千至四萬餘千不等俱已按圖查戶分
關給錢窮黎可資接濟又蘇州省城於上冬分
設粥廠之外猶恐遠近貧民跋涉擁擠強悍者

慮其滋事老弱者難免向隅當又率屬捐廉挑
施擔粥每一擔約可給百人以上分勸紳庶之
家有力者日施數擔卽力微者亦可合數人以
成一擔各就本圖鄰近地段同時挑擔分施凡
老幼孤寡殘廢之人力難赴廠領粥者皆得就
近給食衆擎易舉所濟較多各屬官紳咸相效
法城市之內多者至百餘擔少者亦數十擔其
各鄉零星擔數雖多寡不齊合而計之亦與城
市相埒行之數月差少餓斃之人其餘有買米

平糶者有採辦雜糧輓轡糶施者有收養幼童
棄孩及流亡病勾者有捐修各項工程以代賑
濟者延至此時天氣較爲暄暖窮黎亦得備趁
謀生察看民情較上冬實有起色恐塵

宸念謹將辦理情形附片陳明伏祈

聖鑒謹

奏

各屬拏獲兇盜要犯分別審辦情形片

再大江南北積歉連年安分良民原不至藉荒
滋擾而兇悍之徒因乏食而流爲匪類者原情
雖不無可憫而禁暴則不得不嚴臣疊經出示
曉諭以各屬裁歛之區屢蒙

皇上天恩蠲緩賑恤有加無已惟恐一夫不獲其所
並經地方官捐廉勸諭紳富集資接濟凡以養
其廉恥使之勉爲善良若藉口饑寒爲匪不法
斷不能曲爲寬貸一面嚴飭緝捕有犯必懲其

中掣獲圖財害命之案除高郵州事主陳保懷
被殺一家二命獲犯高大陳登三高全玉等已
奏明嚴辦外又經掣獲上海縣張小狗圖財勒死
幼孩李關淋一案海州高照隴圖財謀殺房泳
盛一案無錫沈阿三圖財謀殺張大觀一案海
州朱廣道耿惠沅圖財謀殺潘徐氏燒屍滅迹
一案沐陽姜繩煥聽從張三禿剝取姜二運衣
服勒死燒屍滅迹一案均已先後審明按律懲
辦茲又掣獲高郵州船戶蔣其倉蔣其受圖財

謀殺毛起雲及興化縣宋萬高馬亭選圖財謀
殺吳湛恩徐金沅等案而宋萬高商同馬亭選
先後雇船行至中流乘船戶吳湛恩等不備推
溺斃命將衣服船隻賣錢分用與臣現在

奏辦姜開沅等推溺船戶之案兇惡相類業經分
飭確審嚴辦竝剴切札諭沿江湖河一帶文武
員弁加意巡防一有報案立掣務獲如有玩延
卽當徹參示儆刻下民情頗爲舒展水陸均甚
安恬而捕務仍時刻從嚴庶足以靖地方而安

行旅至糧船水手最易滋事經給事中金應麟
條奏欽奉

上諭漕船水手沿途訛詐擾累商民種種不法情弊
必至遲誤重運爲害地方不可不嚴行懲辦著林
則徐嚴飭所屬於內河地方凡漕船停泊經行之
處訪查各弊嚴行申禁如仍有前項弊端卽責成
地方官隨時懲辦其徇縱之運弁立予參革以肅
漕政而除民累欽此當經恭錄轉飭欽遵嚴行示
禁彈壓巡緝去後節據各屬稟報此次江浙兩

省漕船經由內河北上因催餉緊急晝夜遄行
水手人等并未泊船上岸尙無橫截河中需索
買渡錢排幫錢及用糧米傾入商船訛詐分肥
各情弊惟查糧船自上冬歸次以逮本年開行
爲期數月之久此等羣聚水次趁閒恃眾靡惡
不爲是以搶劫之案出於糧船水手者尤多惟
有隨時嚴拏懲辦計自上年十二月至今今年正
二月內拏獲滋事水手如婁縣稟獲夥劫黃勝
榮等行船之水手張明德李永年朱永春周德

榮王得富五名又獲搶奪丁琪行船之水手宋
廣德一名又獲搶奪周德順行船之水手韓光
玉劉四海于培松王志張明受五名又據江陰
縣報獲行劫旗丁吳鳴揚之水手徐運時常德
勝蘇大中三名又據陽湖縣報獲搶奪楊紀興
之水手安貴李順二名均因關係搶劫重情批
行臬司分別提省飭屬確訊追贓按律嚴辦此
外尙有盤踞船艙搶拉頭縴硬送水手勒加辛
工種種不法非但擾害商民卽幫丁亦深受其

累凡被人告發及得自訪聞之犯皆卽率獲嚴
訊分別究辦始覺稍爲斂戢現在各幫重船計
已過淮陸續渡黃北上臣仍照案咨行沿途一
體催僱彈壓以期悉臻安靜合併附片縷晰陳
明伏乞

聖鑒謹

奏

驗收劉河挑工竝出力人員請獎摺

奏爲開浚劉河併建設石壩涵洞各工全行告竣
驗收如式請將格外節省餘銀疏挑上游各源
流淤淺處所以資久遠竝擇在工尤爲出力之
官紳董事分別懇

恩獎勵恭摺奏祈

聖鑒事竊照太倉鎮洋境內之劉河爲古三江之一
前因淤塞多年幾成平陸旱澇無備田畝頻至
歉收爲目前必不可緩之工當經_臣等會摺

林文忠公政書

日集江蘇奏稿

五

奏蒙

恩旨俯准借項興挑分年攤徵還款凡在蘇松太三屬得霑水利之處無不頂感

皇仁踴躍趨事

臣

等轉飭司道府縣督率委員董事

分段承挑勒限完竣並以工段綿長如其中有可格外節省之處亦宜隨時斟酌據實稟辦嗣據署太倉州知州周岱齡署鎮洋縣知縣曾承顯委員前上元縣知縣現署元和縣知縣黃冕等會稟原估各工土方丈尺均係覈實無浮惟

河勢彎環之處若相機取直尙可加意撙節查老虎灣至紅橋灣舊河向南圍繞今由吳家墳港取直挑至小劉河口匯歸原河計可省工一千八百餘丈又陶家嘴錢家嘴舊有河形亦俱向南繞越若再取直開挑可省工五百餘丈又原議於閘外白家廠建滾水石壩一道以禦渾潮茲查石壩固足禦潮但恐內河水大宣洩欠靈因於該壩添設涵洞五所俾潮大時將洞閉塞不使渾水漫入設遇內河水大即可全行開

放宜洩入海操縱較有把握等情復經批飭妥辦卽據藩司先後報放銀兩於本年三月初八等日陸續開工幸天氣暄晴人夫雲集印委各員及董事人等皆能認真督率嚴催所有應挑土方於四月底卽經挑竣臣陶澍出赴蘇松閱伍之便會同臣林則徐暨藩司陳鑾到工驗收沿途香花載道欽感

皇恩歡忭異常驗量所挑丈尺有贏無絀惟河身旣已浚深則隄岸愈高轉有崩卸之慮復令逐段

挑切以歸一律又海口砌築石壩添設涵洞凡石料樁木錠錫灰漿購運鳩工有需時日復飭趕緊料理旋據太鎮二州縣暨委員具報通工全行告竣又經臣林則徐臨工覆驗河身倍見深通隄岸一律平整間座俱臻堅固涵洞最便蓄宣均無草率偷減情弊查劉河自吳家墳港口起至白家廠又鹽鐵老壩基起至吳家墳港又老虎灣至紅橋灣及陶家嘴錢家嘴等處原估工長一萬五百一十六丈面寬十丈餘尺至

八丈餘尺不等底寬三丈平水面浚深九尺又南北兩岸切灘並挑土山土埂以及估築通工壩開空廢民田給價等項其估銀一十六萬五千三百二十餘兩今將吳家墳陶家嘴錢家嘴等處取直開挑又省工二千四百餘丈少挑土十五萬六千餘方計通工土方連修築開壩空廢民田給價等項共銀十三萬四百二十二兩零較之原估格外節省銀三萬四千九百兩零據蘇州藩司陳鑾請將前項節省餘銀留辦上

游淤淺處所併查明在事尤爲出力官員紳董酌議分別獎勵詳請具

奏前來^臣等伏查劉河工程係屢經^上奏明必應辦理之工祇因工鉅費繁有需籌措茲以濬清堵濁之法擗節估挑仰荷

聖恩借帑興辦而相機取直則於節省之中又有節省此次工竣之後適七月二十三十四五等日蘇松一帶大雨傾盆太湖附近諸山陡發蛟水處處盛漲拍岸盈隄當卽飛飭太倉鎮洋二州縣

將該壩涵洞全行啟放據稟滔滔東注兩日之內消水二尺有餘而秋汛大潮仍無倒灌是劉河之容納與涵洞之宣洩實已著有成效惟思三江之水無不承太湖而來而自太湖遞至三江其中淤澱等處均係經由要道淤塞多年前因三江尚未全疏無暇兼顧臣陶澍於順勘劉河工程片內即經聲明尚須再浚上游各澱茲劉河工程得以格外節省即上游水道亟須擇要接挑又太倉州有七浦河一道在州境東北

直達海口形勢較劉河爲小實則與爲表裏亦因年久淤塞僉懇一律疏通此等水利工程在江蘇原不勝枚舉然其最爲扼要之處所繫於利害者匪輕若不乘時興修脈絡仍多阻滯竊思前項節省餘銀本係原估應行動用之款今因逢灣取直極力省出即留作挑浚支河之用實屬以公濟公合無仰懇

聖恩准將節省餘銀於各處淤淺河道擇要興辦所有劉河借款仍照原估十六萬五千三百二十

餘兩之數歸於太鎮等十六州縣分年攤徵還款自足以資遠利而愜輿情至此次挑辦劉河在工印委各員及紳董人等均係自備資斧奮勉趨公不辭勞瘁似應量予獎勵惟人數眾多_臣等未敢悉登薦牘謹擇其尤為出力者開具清單恭呈

御覽如蒙

聖主鴻慈俯加鼓勵該官紳等倍加感激踴躍急公_臣等亦得收指臂之效其出力稍次人員在外

分別記功給獎除同時捐挑之白茆河道現亦將次全完容俟驗收另行具

奏併飭將劉河工長高寬丈尺土方夫工銀兩各項價值細數另開清單一面將太湖以下泖澱支河暨太倉州境內七浦河道委員確勘估計銀數分別詳請

奏報外所有_臣等驗收劉河工程緣由謹合詞恭摺具

奏伏乞

皇上聖鑒訓示謹

奏

協辦浙塘條石動款摺

奏為遵

旨協辦浙江海塘條石並動用銀款緣由恭摺奏祈
聖鑒事竊臣承准軍機大臣字寄欽奉

上諭浙江塘工應用條石為數甚多著林則徐採辦
條石四萬丈務於來春全數解交浙江工次應用
等因欽此當經恭錄行司欽遵查照乾隆年間
蘇省協辦浙江海塘條石成案派令出產石料
之蘇州府屬太湖吳縣常州府屬無錫宜興荆

溪等五廳縣分領承辦一面將應行採運各事宜臚列條款咨詢浙省去後旋准覆稱協濟條石四萬丈內應辦面石三千三百丈牆石一萬二千丈裏石二萬四千七百丈均由江蘇就地鑿鑿委員運赴浙省之施賀二壩交浙江委員接收所有石價鑿工運腳俱照成案由蘇自行給領浙省先解銀五萬兩交蘇州藩庫兌收應用其不敷之項亦照前案由蘇找發自行報銷等因臣當飭藩司陳鑾查覆茲據詳稱浙省所

撥銀五萬兩現在尙未解到而蘇省業經開採亟須發銀給辦且覈計工料運費除浙省撥銀五萬兩外不敷尙多應請在於蘇州藩庫正項道光十四年秋撥款內先撥銀五萬兩以資支用統俟事竣同浙省解到銀兩覈實報銷如有盈餘另行

奏請撥還歸款又查乾隆年間海塘石料曾由浙江委員來蘇會辦此次准到浙省咨覆因值與舉大工勢難多派委員駐蘇督採等因但江蘇

各廳縣辦石既多卽難保無丈尺參差石質高下若不就開採之地逐一驗明任聽承辦各員徑行運至工次事關隔省一經駁回更換往返需時不特運費虛糜轉恐要工停待現在商明俟蘇省採有成數咨會浙省酌委妥員來蘇量驗不如式者就地立即駁換如果合式卽於石上蓋用浙省委員驗明戳記並標明尺寸再令起運赴壩其在壩收石之員除查無委員驗明戳記及雖有驗戳而途中別經磕碰折斷殘損

不准擅交外其與驗記符合者收石之員亦不得故意刁難勒令守候致啟需索而誤工需再查蘇省產石廳縣惟太湖吳縣石質尙堅堪以選充面石牆石之用其荆溪宜興無錫多係黃石質地鬆脆溯查乾隆四十六年間欽奉

諭旨無錫宜興荆溪三邑之山質雖鬆脆堪作裏石之用等因欽此此次該三縣之石自應照案採作裏石仍飭加意選擇務合工用合併聲明等情請

奏前來

林文忠公政書

甲奏

江蘇奏稿

三

限足額以濟要工不任稍有遲誤外所有採辦石料動用銀款緣由理合恭摺具

奏伏乞

皇上聖鑒謹

奏

會奏白茆河挑工驗收并出力人員請獎摺

奏為捐資挑濬白茆等河并建築閘壩工程全行告竣驗收如式請將捐輸出力之官紳董事分別獎勵恭摺奏祈

聖鑒事竊照常熟昭文二縣境內有白茆河一道於三江之北別成一大支為蘇常兩郡洩水尾閘淤塞多年幾成平陸旱澇無備急須挑濬前經勘估土方竝建閘等項共約需銀一十一萬兩零因與劉河挑工同時并舉未敢概請借

帑議由官民捐資興辦以工代賑奏奉

諭旨隨捐隨辦免其造冊報銷等因欽此當即轉行

欽遵辦理臣陶澍臣林則徐各倡捐銀一千兩

藩司陳鑾捐銀二千兩蘇松糧道陶廷杰捐銀

三千兩蘇松太道吳其泰捐銀五千兩前任蘇

州府知府沈兆澧署常熟縣事試用知縣藍蔚

雯各捐銀一千兩昭文縣知縣張組綬捐銀六

千兩此外紳民捐項除安徽候選道章廷榜所

捐二萬兩內奏明以一萬兩撥歸白茆經費外

餘皆常昭二縣紳商富戶隨時捐集因係地方

水利均各踴躍樂輸統計官民捐項較之估需

銀數有贏無絀於本年三月初一日開工興辦

並因附近白茆之徐六涇及東西護塘河均係

呼吸相通亦須兼濬飭據藩司陳鑾親往履勘

估計一體開挑並先後委員分赴各工催償又

因其時本係以工代賑壯者固可自食其力而

老弱殘廢之人不能工作饑寒可憫復於辦工

經費內力加節省量予接濟俾附近工次悉歸

安靜臣陶澍於四月內至蘇松一帶關伍會同

臣林則徐到工量驗所挑寬深丈尺多有逾額

沿途香花載道閭閻歡抃異常旋據稟報五月

十九日挑工全竣復經臣林則徐督同藩司陳

鑾按段驗收自昭文縣之支塘東勝橋起至海

口止工長七千八百四十丈原估面寬六丈底

寬四丈深一丈旋又將河面展寬二丈以資容

納河身倍見寬闊隄岸一律坦平惟海口建築

閘壩因須購備石料椿木等物未及同時興舉

復於七月間施工至十月二十三日據報閘壩

工程全行完竣復委藩司陳鑾赴工驗收茲據

該司詳稱驗明各工均係如式堅固並無草率

偷減情弊統計土方夫工以及閘座工料戽水

築壩並就近接濟老弱饑民一切經費共用銀

一十一萬五千二百七十八兩零應遵前奉

諭旨免其造冊報銷並查明在事出力之印委各員

及董事捐戶人等酌議分別獎勵詳請具

奏前來臣等伏查白茆等河本係早經勘估必應

辦理之工惟因需費繁多未能遽行興辦茲於地方連歉之後官紳設法集捐以工代賑民夫得資口食踴躍赴工未敢借動

帑金而水利以興窮黎以濟洵為一舉兩得加以開壩並設蓄洩咸宜淤塞無虞旱澇有備即如本年七月間太湖陡發蛟水幸賴新河通暢宣洩極靈惟形如釜底之田未能即時消涸其餘連歲被淹處所皆幸得免沈災成效已臻輿情允洽所有大小官員捐資籌辦除臣陶澍臣林

則徐暨藩司陳鑾無庸議外其餘糧道陶廷杰蘇松太道吳其泰前任蘇州府知府沈兆澧職分較大均不敢請邀議敘又總辦出力之委員前高郵州知州平翰已荷

聖恩升授通州知州亦不敢請獎外臣等會同查明擇其捐項較多勞績最著之印委各員及捐輸出力之鄉紳董事分繕清單恭呈

御覽仰懇

聖主天恩分別獎勵以為急公者勸此外出力稍次

員弁及捐銀在三百兩以下各戶應由臣等在
外給獎除工料丈尺細數遵

旨無庸造冊報銷仍飭取捐戶履歷清冊另行咨部
給照外所有驗收白茆等河工程緣由謹合詞
恭摺具

奏伏乞

皇上聖鑒訓示謹

奏

彈壓水手情形片

再臣接閱邸抄欽奉

上諭各省糧船數千號水手不下數萬人必須實力
稽查咸知儆畏方不致沿途滋事近日山東東昌
府境內廬州幫水手聚眾械鬪一案致斃數十餘
命之多且糧船所過地方時有折體斷肢漂流水
面皆由水手戕害所致此等積習自宜亟加整頓
嗣後糧船所過地方著沿途各督撫遴派武職較
大之營員酌帶兵丁一路接遞巡查遇有水手滋

事立即嚴拏有犯必懲毋令一名漏網等因欽此
伏查歷屆糧船入境本皆酌派營員會同府廳
州縣督帶兵役彈壓稽查惟水手恃眾逞兇已
非一日而近年爲尤甚除廬州二幫在東省殺
斃多命之外其沿途糾眾鬪經地方文武彈
壓解散者探聞所在多有卽如蘇省之鎮江前
後兩幫最爲著名兇悍劫殺擄搶靡惡不爲且
與浙江湖州府屬八幫向有積仇各不相下而
鎮江幫水次本在徒陽又爲浙船必經之路重

運先後開行尙可不令遇見追回空過鎮輒卽
糾約復仇上冬臣得有風聞先期親赴鎮江催
提軍船卽督率文武彈壓訪拏酌示懲儆其風
始息今冬河乾水淺雖經設法灌蓄亦僅容一
葦之杭若湖鎮兩幫狹路相逢定必滋事與其
懲辦於事後莫如防範於未形查丹徒境內有
江邊之鮎魚套地方清穩背風爲浙船不必經
由之處現在鎮江前後幫船均已渡江入境經
臣咨會漕臣飭令該兩幫船隻先進鮎魚套寄

泊並委鎮江營參將繼倫督率備弁駐兵彈壓
俟浙幫全行出境之後再歸兌糧水次以免尋
衅互鬪是以現在計算進口船數該兩幫並不
在內其實已泊本境地面儘可油艖修船卽與
歸次無異又查在東滋事之廬州二幫沿途復
與鎮海前蘇白糧等幫屢圖糾鬪因逐段有官
兵彈壓幸未成事但廬州二幫係兌常熟縣漕
糧鎮海前幫係兌昭文縣漕糧該二縣既屬同
城卽糧船同一水次難保不又滋鬪臣現飭糧

道量爲調換毋使並在一處其蘇白糧渡黃之
後廬州二幫復與接連行走現亦飭令先後挽
渡務使分檔隔遠以杜其圖鬪之心臣仍派委
標營將領並咨會督臣提臣分委武職大員稽
查催攢一到水深之處卽令晝夜行駛不任一
刻停留惟淺處曳纜絞關每段增雇人夫數百
名仍形喫力有數刻之久始能挽過一船者前
幫未克通行後幫卽皆停泊更須嚴密防範是
以臣仍駐丹徒督催彈壓一時未敢回蘇合竝

附片陳明伏祈

聖鑒謹

奏

回空漕船全進橫閘彈壓安靜摺

奏爲江浙回空漕船掃數催進橫閘欽遵

諭旨派兵彈壓均極安靜恭摺奏祈

聖鑒事竊照本年回空南下較遲鎮江運河潮枯水
淺京口沙灘涸露難以通舟當經查照成案改
由橫閘行走旋據府縣稟報十一月初八日以
後西風大發江潮消落異常閘口露出之沙反
高於江面之水並橫閘亦難進船臣得信後卽
馳赴丹徒鎮駐劄親率常鎮道李彥章暨鎮江

府縣設法攔蓄並於附近運河各處尋覓積水
引灌濟送一面分段派員多雇人夫拉船撈淺
催提各幫陸續進口業將辦理緣由並催過船
數先後具奏欽奉

硃批務要竭力盡人事以理之不可藉口諉爲天時
水勢也勉之欽此臣跪誦之下倍當竭誠盡慎將
幫船速挽歸次以慰

宸懷臘月以來雨雪疊霑正喜運河得以長水而連
值北風狂大江中數日未有船行軍艘尤不宜

冒險加以雪後嚴寒內河凍結復飭署鎮江府
王用賓署丹徒縣張寬培多備敲冰船隻晝夜
開鑿十二月十二日河道始通亟令署京口協
副將張成龍察看風色稍平卽親帶幫船折戩
渡江常鎮道李彥章與鎮江營參將繼倫來往
江干互相策應每當阻淺阻潮阻風阻凍之際
在事文武各員倍加焦思竭慮設法籌催不敢
稍遺餘力除提前之浙江幫船先經過竣其江
廣幫船亦已全數出江外茲截至十二月十九

日將先泊鮎魚套之鎮江前後幫船作為尾幫亦令進關歸次統計江浙兩省回空共六十二幫計船二千二百零四隻掃數由橫關跟蹤南下各歸水次查軍船自道光八年以後歷由橫關進口然少者僅數百隻即多者亦止一千餘隻從未有江浙兩省回空之船全由橫關行走者今冬河水至乾而經由橫關之船較之歷屆多至兩三倍臣惟恐回空不能全進致如從前留在江外過年則新漕幾難提前催辦幸荷

聖主洪福自進口以迄竣事計三十五日各幫到次修船均在歲前可期速為開兌且於連旬風暴之中各將領往來江上提帶二千二百餘艘並無一船疏失臣恭繹竭盡人事之

旨下忱感幸悚惕彌深至糧船停泊之時水手尤虞滋事前奉

諭旨遴委武職較大之營員酌帶兵丁一路接遞巡查遇有水手滋事立即嚴拏等因欽此臣當將欽遵辦理緣由附片奏蒙

聖鑒在案月餘以來橫閘內外及金山鮎魚套一帶
節節停船皆係鎮江京口水陸兩營將備率帶
弁兵支架帳房常川彈壓已臻安靜迨鎮江前
後兩幫最後進口其水手尤爲強悍臣復與京
口副都統岱臣面商就近酌飭駐防滿兵一體
彈壓以壯聲勢該兩幫內桀驁之水手聞有添
兵恐被查拏率已潛行逃竄不敢過江遺有刀
械在船卽經弁兵逐件搜獲撥營配用並責令
幫弁旗丁換雇安分水手駕船赴次受兌一面
嚴查在逃各水手姓名籍貫及曾犯何案隨時
飭拏務獲有犯必懲總期猛以濟寬令行禁止
以仰副我

皇上除莠安良之至意所有回空掃數進口緣由謹

會同兩江總督臣陶澍恭摺具

奏仰慰

聖懷至在事出力文武各員本係分內應辦之事惟
此次辛勞繁費實與常年催償迥不相同伏查
道光八年橫閘催船一千一百餘隻仰蒙

恩旨量加鼓勵此次船數加倍可否循照八年成案

准予酌獎之處出自

聖主鴻慈如蒙

恩允容臣會同督臣擇其尤為出力之員覈實具

奏不敢稍有冒濫合竝陳明伏乞

皇上聖鑒謹

奏

會奏官銅商辦運洋銅請復舊章摺

奏為蘇省辦銅官商賠累難支懇請酌復舊章以

全銅運而垂經久仰祈

聖鑒事竊照蘇省官商承辦直隸陝西湖北江西浙

江江蘇六省鼓鑄洋銅前於嘉慶二年僉商王

履階承辦

奏定每百斤例給價銀十三兩五錢九分三釐每

年額辦六省洋銅其五十萬五千九百六斤歷

給價銀六萬八千七百七十八兩七錢八分豫

給一年

帑本嗣王履階之弟王日桂接辦十有餘年銅帑兩清從無貽誤迨嘉慶十三年程洪然投充官商自願減價每百斤祇請價銀十二兩並願先繳銅斤後領

帑項其意祇圖邀准未計虧賠自此更改舊章不久卽因力乏告退後商汪永增接辦僅止四年亦卽乏退復舉舊商王日桂之子王宇安

奏充以資熟手當據該商稟請復還舊制未經准

行仍照減價後帑之例辦理王宇安連年賠累屢次求退因無人愿充著令勉力承辦嗣據蘇州府詳據現商王宇安以前商程洪然率請改易章程減價後帑以致連年虧累資本全空稟求循復舊章仍領十三兩五錢九分三釐之價豫請一年

帑本俾得源源辦運等情當經藩司批飭確查疲乏情形果否屬實覈議詳辦去後旋據蘇州府知府沈兆澐寶蘇局監督榮匯覆稱官商承辦

洋銅從前原定章程本屬妥善是以銅幣均得
清完嗣因前商程洪然呈請投充自願減價先
銅後幣承辦未久卽行乏退以後各商遺累虧
賠旋充旋退該商王宇安接手之始卽據稟復
舊章未經批准歷年疲乏求退曾僉殷戶分辦
又皆畏縮不前惟有懇復前

奏舊章俾銅運得以經久等情由藩司陳鑾覆查
屬實詳請具

奏前來臣等伏查蘇省官商辦銅從前

奏定章程照發幣採辦價值之例每百斤給價銀
十三兩五錢九分三釐並豫給一年

幣本王履階等弟兄相繼歷辦十有餘年尙能支
持無誤後商程洪然於嘉慶十三年自願減價
接充頓改舊章並未計及辦公掣肘以致虧乏
退商迨嘉慶二十二年以現商王宇安

奏充該商接辦之初卽據稟請復舊未經批准嗣
以無力賠累節次稟退經升任撫臣程禱采查
僉殷戶承充均各視爲畏途僉名莫應只得責

令王宇安勉力辦理不准退歇近年以來銅船
屢次遭風倍形苦累經該司府飭查至再臣等
復加察訪委係實在情形查蘇局洋銅為六省
鼓鑄要需若不酌復舊章必致缺誤並查程洪
然減價後帑之案雖經

奏明實出自該商一時遷就之見今據請仍復嘉
慶十三年以前舊制覈與原案相符非另改新
章之比但豫給一年

帑本設有轉運遲誤

帑項未免虛懸應不准行惟每百斤給價銀十三
兩五錢九分三釐本係從前

奏定章程並非格外加增合無仰懇

皇上天恩俯念商力疲乏准予循復舊章以敷辦運
其價六省分銷贏縮亦尙有限如蒙

俞允應請卽從道光十五年為始飭令遵照妥辦俾
免藉口求退無人接充致誤六省鼓鑄重務除
飭司另覈章程細冊詳請咨部外臣等謹合詞
恭摺具

奏伏乞

皇上聖鑒訓示謹

奏

蘇省並無洋銀出洋摺

奏為江蘇省行用洋銀不至運往外洋遵

旨體察情形酌覈覆

奏仰祈

聖鑒事竊_臣等接准戶部咨欽奉

上諭前據御史黃爵滋奏紋銀洋銀應並禁出洋杜絕仿鑄從重科罪一摺當交刑部妥議具奏茲據刑部將仿鑄洋錢明定治罪科條具奏著照所議辦理其禁止洋銀出洋於海洋交易事宜是否可

行著沿海各督撫體察情形妥議章程酌核具奏
餘依議欽此仰見我

皇上於防微杜漸之中寓因地制宜之意當經恭錄
欽遵轉行司道府州將各海口情形備細體察
籌議去後茲據蘇州布政使陳鑾江蘇按察使
裕謙蘇松太道陽金城會議詳覆前來臣等查
該御史請禁洋銀出洋原奏以內地有仿鑄
洋銀之弊若紋銀有禁而洋銀無禁恐奸民盡
以紋銀鑄爲洋銀資外夷無窮之利其言原爲

杜弊起見惟洋銀行用情形各省本不相同其
始祇用於粵閩漸次乃及於江浙江蘇本居腹
地市肆買賣行用較多其濱海之區雖設有江
海一關准令商船出入然止北至山東奉天南
至浙江閩粵並無與外夷互市之事較之粵海
關例准夷船貿易者情形迥不相同且奉天山
東二省向不行用洋銀故上海出口沙船只有
帶貨北行並無帶洋銀前往者蓋南貨販北可
以取贏若帶洋銀全不適用是以不待禁止而

人自不肯爲其浙江閩粵海船攜帶洋銀來至上海置買蘇松貨物者往往有之若將蘇省洋銀載運往南則又百不得一蓋江浙洋銀價值向北閩粵等省爲昂緣其物本由南來輾轉流行愈遠則作價愈貴浙江貴於閩粵江蘇又貴於浙江商賈計及錙銖豈肯貴買賤售甘心折耗且即使有人帶往亦祇於浙江閩粵互爲流通而非遽資外夷之利以蘇省情形而論洋銀行用祇在內地不往外洋今若創立例禁則閩

粵洋船來至上海者均不得攜帶洋銀是欲截其去路而先斷其來路於商民買賣海關稅務未免皆有窒礙至謂內地鎔化紋銀仿鑄洋銀如原奏所稱蘇板吳庄錫板等名目向來誠有此種作偽之弊然仿鑄原以牟利自必攙雜銅鉛然後有利可牟而近來民間兌驗洋銀極爲精細蘇板等類較洋板成色懸殊以之兌錢價值大減是以客商皆剔出不用民禁嚴於官禁行商公估絲毫不能隱瞞是仿鑄之洋銀在本

地已不能通用更何能行及外洋况經刑部議
定新例奸民消化白銀仿鑄洋錢卽照白銀出
洋之例分別治罪自足以杜其弊若洋銀出洋
之禁雖未知於閩粵等省何如而就江蘇言之
似可無庸多立科條致滋紛擾除通飭各屬嚴
禁仿鑄有犯必獲以清弊源外謹將體察蘇省
情形毋庸禁止洋銀出洋緣由合詞恭摺具
奏再_臣等因分飭各屬詳加體察並自行明查暗
訪反覆推求是以覆

奏稍稽合並聲明伏祈

皇上聖鑒謹

奏

勘估寶山塘工摺

奏為寶山縣海塘工程籌議捐修規模已具應卽興工隨捐隨辦謹將勘估情形奏祈

聖鑒事竊照太倉州屬之寶山縣三面環海境內土塘一萬五千餘丈石塘一千三百丈石塘之內仍加土戩其沿塘迎險處所外釘排椿填砌塊石自靠塘一層至二三四五層不等歷年久遠潮汐激盪椿石損缺之處風浪遂及塘身嘉慶四年十年兩次遭被風潮疊經奏准動

帑興修迄今又閱卅餘年每遇伏秋大汛土石各工被潮潑損責令該縣隨時擇險搶修權為保護本年六月十四日陡遇異常風潮水勢飛騰高起數丈沿海塘隄率多冲塌經臣陶澍先將大概情形奏奉

硃批查明據實核辦欽此臣林則徐接據沿海各屬稟報當查風潮冲壞塘工以寶山為最甚除飭先行擇要搶護外復委藩司陳鑾親赴寶邑會同蘇松太道陽金城逐加查勘該縣江西各段

土塘穿缺一千七十餘丈殘損二千一百八十八餘丈江東各段土塘穿缺一千一百餘丈殘損四百四十餘丈石塘冲裂六丈其餘亦多殘損雖經該道陽金城督縣捐廉趕做土戩暫為擁護而急須大加修築方足以資抵禦臣等往返札商以此項工程浩大保障攸關斷不可遷延貽誤而

國家經費有常又值浙省大修海塘之際不敢復以江蘇塘工請動

帑項因思該縣士民素尙好義急公上年賑案勸捐已各勉力輸助今海塘爲地方保障尤期衆力同擎當飭該司道體訪輿情妥爲勸諭一面由臣林則徐先行附片陳明欽奉

硃批所辦妥等因欽此臣等卽率同司道州縣捐廉爲倡並勸諭城鄉紳庶陸續書捐至七月初間已得十萬有零之數正飭印委各員會同估辦開復據蘇松太道陽金城等稟報七月初二日未刻又有颶風突起雨驟潮喧徹夜震撼至初

三日未刻始經漸息寶山江西各段塘面所築土戧均被風潮漫溢全行穿缺江東各段新築小圩沖缺五百餘丈舊隄亦處處增坍等情臣等仍飭該縣俟潮勢稍落先行設法堵禦一面飭據太倉州知州李正鼎督同寶山縣知縣毛正坦暨委員候補知縣龔潤森鎮洋縣知縣孔昭顯坐補崇明縣知縣徐家槐等趕緊逐一履勘估計茲據稟覆舊塘本嫌陡直收分過少不足以柔潮勢今加築新塘擬用外面三收裏面

二收底寬八丈頂寬二丈高至一丈二尺普律齊平所有舊塘業已殘損過半若卽以新土鑲築恐新舊不相膠黏應將舊土一律剷平將凸補凹鋪作塘底潑水行砥再以新土層層加築套礮飽錐以期堅固塘外簽釘排椿填砌塊石層數不等其小沙背談家濱一帶形勢尤爲頂沖除外面多加椿石俾資保護外並於裏面加築新塘以爲重門保障又該處舊有挑水壩二道久經殘廢今一並修復仍於壩外雙椿夾石

以資挑溜至石塘沖裂殘損各段普律添購新石砌築完整其石塘尾段與土塘交接之處加土裹護並加石壩三層合計江西江東應估礮築土方約共三十五萬六千四百餘方石塘添辦青條石一百九十餘丈通工椿木約須六萬一百餘根碎石二萬一千三百餘方統計銀數須得二十萬兩有零方能料足工堅永資鞏固並據司道核覆所估並無浮捏等情臣等伏查寶山縣境江東江西所轄土塘本年兩遇風潮

穿缺殘損只有五千餘丈其石塘亦多沖裂脫卸既經該州縣等確加履勘逐段修復竝將石塘添砌新石土塘加幫高寬且於頂沖處所裏面添築新塘外建挑水壩二道以復舊制沿塘簽釘排椿填砌塊石再於石塘工尾土石交接之處築土裹護外加石壩三層俾工段益增鞏固實可爲一勞永逸之計所估土方椿石覆核尙無浮多惟統計銀數須得二十萬兩有零方敷辦理而捐項甫經及半若必俟全數捐足始

行興工則今冬已恐無及明歲春潮驟長抵禦無資人心惶惶深爲可慮

臣

等復經採訪衆論

公同商推事關生民保障不獨寶山一縣紳庶自衛身家捐輸已形踴躍卽貼近之嘉定上海二邑亦皆唇齒相依尙可互勸集捐以期衆擎易舉因令先將已捐之項採購料物趕運赴工並於寶山紳耆中公舉總董數人散董數十人分司其事現在將屆立冬水勢消落應卽擇吉開工派令印委各員分頭催辦並飭蘇松太道

陽金城率同太倉州知州李正鼎時刻來往稽
查不任稍有草率一面續勸協捐以資辦理察
看該處民情因見各官捐廉倡辦係為保衛民
生起見無不心懷感奮雖需款繁鉅而妥為勸
導稍寬時日自可有成統於竣工之後查明捐
戶銀數照例

奏咨鼓勵加有格外多捐者容_臣等酌量懇

恩加獎仍嚴札州縣毋許抑勒科派並飭杜絕虛糜
不准有絲毫浮費如能格外撙節即可稍減捐

數總期認真核實以蔽鉅役而奠海疆一俟通
工完竣_臣等酌往驗收另行具

奏再該工既係捐辦應請照案免其造冊報銷據
該司道會詳請

奏前來_臣等謹將勘估籌辦情形合詞恭摺具

奏伏乞

皇上聖鑒訓示謹

奏

劉河節省銀兩撥挑七浦等河摺

奏爲蘇州省水利工程動用劉河節省銀兩擇要
舉辦其餘酌量捐修恭摺奏祈

聖鑒事竊照江蘇號爲澤國而財賦甲乎東南賦出
於田田資於水故水利爲農田之本不可失修
如吳淞黃浦劉河乃三江之舊蹟白茆河又別
爲一六支近年以來或動項或捐挑均經奏奉
諭旨准辦以次深通小民感戴

皇仁同歌樂利此外尙有太倉州境內七浦河道及

太湖以下泖澱等處亦多湮塞亟宜擇其要道挑空疏通俾上下一氣呵成清水暢流以刷潮淤而資灌溉查上年借項興挑劉河案內有節省餘銀三萬四千九百兩經_臣等於收工時

奏蒙

恩准留作接挑各處河道之用當即行司飭委前署太倉州現署蘇州府知府周岱齡青浦縣知縣蔡維新等會督各該州縣周歷履勘次第舉辦旋據稟覆勘明青浦縣境內澱山河一道現尚

深通毋庸開浚外其太倉州境七浦河一道東為海口設有七浦閘一座淤塞已久量應浚工長五千六百二十八丈二尺內有浮橋鎮市河六十丈雖向由該處居民自行開挑而自河淤以來民居大半遷移鋪戶亦多閉歇應一竝給價承挑實需土方填工銀一萬五千二十兩零又元和縣境內南塘寶帶橋一座共五十三孔係太湖出水咽喉年久失修圉洞坍塌以致湮塞水道湖瀦宣洩不靈夏秋盛漲之時深虞泛

溢於水利全局大有關係亟須修整據估工料銀六千六百七十兩零由司確核無浮詳明動支劉河節省銀兩撥給興辦已據具報於本年三四等月先後興工如式挑修完竣經臣林則徐與藩司陳鑾親往察驗並無草率偷減其餘承接太湖之支港各河如吳江縣境之瓜涇港王家匯挑家莊七里港邨前嘴大港新港及太倉州境之楊林朱涇兩河嘉定縣境之華亭涇黃姑塘蒲華塘並據該州縣等勘明皆係上承

下注要道近亦處處淤淺俱應一律興挑以資宣洩除朱涇河華亭涇黃姑塘蒲華塘均由民捐民辦外其楊林河一道竝吳江縣境瓜涇港等處請動劉河節省餘銀興浚又泖湖一處跨連元和婁縣青浦三縣上承太湖及浙西諸水下同黃浦入海蓄洩並用旱澇兼資惟淤土甚多須將新漲之灘切除挑浚方免滋蔓祇因劉河案內節省銀款分辦各河已不敷用據青浦縣蔡維新稟請情願捐辦現已集夫興工歲內

諒可告竣又松江府屬川沙廳並上海南匯二縣其轄之白蓮涇長濱呂家濱小腰涇等河均係跨連數處水利亦已勸捐興辦等情由蘇州藩司陳鑾彙詳請

奏前來臣等伏查劉河節省銀三萬四千九百兩既經奏准留爲接挑各河之用自應核實辦理惟存銀祇有此數而河道淤塞之處悉數難終惟有擇要量准動款其餘可以籌捐者卽歸捐辦可以略緩者卽歸緩辦除七浦河寶帶橋兩

處工程已撥給銀二萬一千六百九十五兩零業經挑修完竣驗收如式外現僅存銀一萬三千二百四兩零以之挑浚太倉州楊林河及吳江縣瓜涇港等處核其工費尙有不敷祇可就款量爲分撥現經給發太倉楊林河銀八千兩吳江瓜涇港等河銀五千二百四兩零飭令乘此水涸集夫趕挑其有不敷悉由該州縣捐廉湊辦所有撥用銀兩統歸劉河案內依限攤徵還款其泖湖朱涇以及華亭涇黃姑塘蒲華塘

白蓮涇長濱呂家濱小腰涇等河或先已挑竣
或現在僱挑皆由官民分別捐輸不敢概動款
項亦不許稍有草率偷減並不得假手胥役地
保致滋弊竇總之地力必資人力而土功皆屬
農功水道多一分之疏通卽田疇多一分之利
賴_臣等惟當隨時率屬講求經理未雨綢繆以
期仰副

聖主劭農勤民之至意再青浦縣知縣蔡維新係卓
異案內應行引

見之員因委估挑工業經

奏准展限在案應俟工竣再行給咨赴部合並聲
明除飭將七浦河等工取造估計報銷各冊繪

圖詳請

題咨外_臣等謹合詞恭摺具

奏伏乞

皇上聖鑒謹

奏

籌議新漕事宜摺

奏為遵

旨籌議趕辦新漕各事宜恭摺覆

奏仰祈

聖鑒事竊

臣

等接准部咨欽奉

上諭朱為弼奏遵旨籌議剔弊速漕各事宜酌擬條款請旨辦理一摺如所稱新漕兌開宜竭盡人力趕早等語著有漕各督撫通飭各該糧道及所屬州縣先事預籌提前償辦至所稱飭提浙江湖廣

船隻無分省分幫次先到先進瓜洲口趕僱來淮盤驗等語著陶澍林則徐妥議具奏至糧艘交卸以後必須趕緊回空庶辦理新漕可期及早受兌著沿途各督撫於回空糧幫趕緊催僱不准藉詞停泊庶幾以速補遲剋期歸次毋得任令延逾致誤例限又稱各衛屯田應妥爲清理等語著有漕各督撫妥議具奏又稱江蘇總運丞倅應管押幫船過淮渡黃等語著林則徐妥議具奏等因欽此當經恭錄轉行欽遵辦理竝將應議各條札飭

江甯江蘇兩藩司江安蘇松兩糧道會同籌議

一面飭令沿河文武員弁督率兵役親駐河干將各省回空幫船剋期催僱

臣

陶澍復經委員

分往北運河及山東臨清一帶加緊催提已於

十月二十八日掃數渡黃完竣惟徒陽運河因

冬令潮弱兼被西風刮耗水勢淺小經

臣

林則

徐預飭該府縣將橫閘支河搶挑深通並令隨

時察看如京口過淺卽飭各幫循舊由橫閘進

口截至十一月初六日催進京口船二百四十

三隻又進橫間船一千一百十一隻共進口船一千三百五十四隻在後幫船現仍飭令晝夜緊催總期趕早歸次不任藉口停延至新漕事宜臣等於秋米報穫之時卽飭有漕各屬先事預籌趕早開倉催徵交兌能得水次早開一日則渡江過淮渡黃抵通均早收一日之效况疊奉

諭旨提前儻辦不特臣等與漕臣及各糧道一體欽遵力求趕早卽有漕之州縣亦惟冀幫船早離

水次如釋重負但一縣之漕糧多者逾十萬石少亦數萬石倉廩每不敷收貯必得隨收隨兌始無積壓之虞而旗丁以米色爲停兌之藉詞以停兌爲索費之把握總因相持不下兌遲則開亦不得不遲臣林則徐於上冬幫船津貼一節循照從前

奏案早飭定議雖爭執刁難之處亦復不少而猛寬兼濟大概不敢以私誤公今冬漕船輪值調幫之年恐貪詐者更有所藉口惟有早爲嚴立

限制確訪尖丁蠹棍懲一儆百以杜阻撓而速兌開本屆收成之時天氣連晴與上冬無異則所收米色亦與上冬無異但幫丁之借題挑剔久已習爲故套今惟照例責成糧道臨倉親驗並委各屬總運廳員逐廠察看凡道廳驗定之米卽不許幫丁混挑妄稟少一分之挾制卽早一日之開行果其自南至北在在加意體卹使旗丁不負重累自可冀漕清運速年勝一年矣又飭提浙江湖廣船隻無分省分幫次先到先

進瓜口一條臣等恭查道光六年欽奉

諭旨琦善奏來年各省漕船請不論幫次隨時提前過淮一摺來年起運新漕節經降旨嚴催迅速儼行若令沿途停候挨延恐致稽遲著照所請浙江幫行抵江境如在江蘇各幫之前卽將浙江幫提前插檔渡江前進江西湖廣各幫先行停泊江面者無論何省何幫卽行儼挽徑進瓜口俟全數渡黃後於邳宿一帶仍令按照原定省分次序順幫前進等因欽此欽遵在案來年浙江重運行抵江

境如果在蘇松各幫之前自應欽遵前奉

諭旨將浙江幫提前插檔渡江前進其江西湖廣各幫如有先行停泊江口者無論何省何幫即行攢挽徑進瓜口俟全數渡黃後於邳宿一帶仍按照原定省分次序順幫前進倘有水手人等爭競擁擠即由該處文武營汛及該幫運弁嚴拏究辦俾知儆畏又各衛屯田妥爲清理一條業經分飭各府州縣衛查屯丁有無私行典賣如有典出之田即行根查明白限一月內開冊

具詳俟覆到即由糧道會同藩司速籌回贖章程妥議詳辦又江蘇總運承倅應管押幫船過淮渡黃一條伏查總運廳員有滯壓水手稽查盜賣之責原應督押所屬尾幫過淮渡黃北上近因守候各州措解存公銀兩以致不克隨幫起程查存公一項即係州縣所給各幫津貼銀內扣出之款嘉慶十七年前任蘇松糧道李長森拏獲通州放債跟幫盤剝一案經前撫

照

臣章

奏明酌量幫情每船提存數十兩封貯俟抵通散
給各丁接濟此項應解總運收貯管帶惟漕船
開行緊迫花戶米石既難概令全輸而

天庾正供不可顆粒短少各州縣墊項買米久已不
得不然又開船以前幫丁水次所用率皆取諸
津貼計州縣逕行給丁之數已屬不貲此項存
公未能即時同解以致總運廳員羈留守候亦
勢之無可如何歷年以來經臣疊檄嚴催未嘗
稍予以暇僅保解交無誤朱爲弼以總運本應

隨幫督押不得因此久延所論亦正嗣後應責
有漕州縣將扣存帶北存公銀兩於幫船開行
十日內按數解交總運廳員收存倘延至所屬
幫船全行渡江之時尙未清解卽先催該總運
迅速起程督運一面飭令將何縣存公已解何
縣未解由總運據實稟明司道責成該管府州
勒令州縣將銀專差趕解總運舟次倘趕送不
到竟至誤公由司會同糧道詳請將該州縣撤
參以儆疲玩此外凡有可以速漕事宜臣等分

飭司道次第妥辦以期漸復舊規斷不敢稍在
因循貽誤茲據該司道會詳前來臣等覆加核
議謹合詞恭摺覆

奏伏乞

皇上聖鑒謹

奏

